

# ایفیسوس

سورت کیریمن هق توهن بری فولوس تولیس  
کفد فواق المسیح د کلیواسن بندر ایفیسوس

## فولوس جانی سئورغ هق باوا تیتہ المسیح

باب 1

- 1 اکو فولوس، هق باوا تیتہ عیسی المسیح ایکوت کهنلق توهن، تولیس سورت نی کفد اورغ ۲ هق جانی میلیق توهن د کلیواسن ایفیسوس، هق فرجانی تگوه کا عیسی المسیح، فس هق دوق سہاتی سپاوا دغن ری.
- 2 اکو مینتہ توهن باف کیت دغن ربی عیسی المسیح، تورون رحمة اتس فواق مو دغن سلامت سجهترا.

## نعمة ۲ هق تورون کا کیت کو جانلن المسیح

- 3 اوہ فوجیلہ کا توهن هق جانی باف عیسی المسیح، ربی کیت. کیت هق دوق سہاتی سپاوا دغن عیسی تولہ، بولیہ تریما دہ دتوهن سموا نعمة ۲ هق کنا دغن روح توهن، فس هق سوغ دغن تمفت کواس فنوہ.
- 4 بلوم فد دنیا ار لاکي، توهن فیلیہ دہ کیت جانی میلیق ری، دغن سابیت دوق سہاتی سپاوا دغن عیسی المسیح. توجوان توهن، نق بری کیت جانی اورغ هق دوق سوچی انتوق ری، تہ سالہ دہ د فنداغن ری.

- 5 توهن فيليه ڪيت ڊولو بالس تو، ڪرآن ڊي ڪاسيه، فس ڊي ڪرت سين ده ڪات، ڪو۽ عيسى المسيح ڪيت نق جاري انق ۲ ڊي. سماو ني ستوجو دغن ڪهندق ڊي بلاڪ.
- 6 ماريله ڪيت ڦاڪت فوجي توهن دغن سابيت رحمة ڊي تو، هق فنوه مليمغه، هق ڊي برڪن تورون ڪا ڪيت هق ڊوق سڀاتي سپاوا دغن انق يڻ ساتو هق ڪاسيه سوڱوگوه تو.
- 7 ڪرآن دغن سابيت المسيح ڪرآن ده پاوا ڊي، ڪيت هق ڊوق سڀاتي سپاوا دغن ڊي، بوليه تبوس ده، ياءِ ڀت توهن امفون ده ڪا ڪيت، بري ڪيت بوليه لفس ڊرڦد دوسا ۲ ڪيت.
- 8 اوه بسر سوڱوگوه رحمة توهن، هق ڊي تورون ڪا ڪيت، هيڱ تاءِ ليه نق بنديڻ!
- 9 دغن رحمة تو، توهن بوڪ بري ڪيت بيڃق بوليه ارتي سماو چادغن ڊي، هق ماءِ نسي تاءِ تاهو ڊولو، تافي هق توهن ڪرت سين ده نق بري سمفرن ڪو۽ جالن المسيح.
- 10 ڪو۽ المسيح نيلاه، بيلا سمفي ماس هق منتوره ڊولو، توهن چادغ نق فرهيمفون بري جاني ستومفوق سمولا، سماو مخلوق هق ار، دلاڻيت اتوا ڊبومي فون، بري سماو تو ڊوق باوه ڊاڪو المسيح.
- 11 فس دغن ڪرآن ڪيت ڊوق سڀاتي سپاوا دغن المسيح توله، توهن فيليه فواق اڪو ڊري ڊولو لاڳي، نق بري جاري مليق ڊي. هق ڊي بوات تو بري پات ڪواس ڊي بوليه بري سلسي فرڪارا مان ۲ هق ڊي منتو ڊولو نق بوات.
- 12 توجوان توهن فيليه فواق يهودي اڪو هق ڊوق هارف ڪا المسيح مولا ۲ تو، ڊي نق بري اورغ بڻسا لاءِ ۲ فون فوجي ڪمليان ڊي جوڪ. بالس تو جوڪ فواق مو فون، بيلا مو دغر خبر هق سبئر تو، خبر يڻ باءِ ڪ هق بوليه باوا ڪي ڪو۽ جالن سلامت، مو فرچاي ده خبر تو. فس روح توهن هق ڊي جنجي ڊولو تو،

بوات تندا دالم هاتي، سروف فوڪول چف ده، کات مو جاي ميليق توهن .

14 هق روح توهن بوات تو جامين کات، کيت نق بوليہ کوء دافن، سمو اف ۲ هق توهن جنجي ده نق بري کاکيت. فد ماس تو، کيت نق بوليہ جاي ميليق توهن دغن سمفرن. دغن کران فرکارا ۲ ني، سوغ فاتوتله توهن، هق مليا تو، نق بوليہ فوجين .

### فولوس مينتاء دعا

15-16 سبب نيلاه، جق ماس اکو دغر بالس مان فواق مو فرچاي کا ربي عيسي، فس بالس مان مو تنجوق کاسيه کا سمو اورغ هق جاي ميليق توهن، اکو اوچف تريما کاسيه کا توهن دغن تاء فوتوس اتس فواق مو. فس کدف ۲ کالي اکو بردعا انتوق فواق مو، اکو مينتاء دغن توهن، توهن هق ربي کيت عيسي المسيح مفاکو کات يي توهن، يي هق جاي باف يغ مليا، اکو مينتاء دغن يي نق بري تورون کا فواق مو، روح يي هق نق بري بيچق، بري بوليہ ارتي اف ۲ هق توهن بري نمفق، فس بري مو بوليہ کهور ۲ کتل يي .

18 فس اکو مينتاء جوگ نق بري توهن بوک مات هاتي مو، بري بوليہ نمفق چرف هرافن مو هق کوکوه سوغکوه، هق توهن لتق، سوروه مو تريما. فس لاگي، نق بري بوليہ نمفق کات مو کاي سوغکوه دغن برکت ۲ هق توهن جنجي کا فواق مو، هق جاي ميليق يي .

19-20 فس اکو مينتاء توهن نق بري بوليہ نمفق چرف کات بسر سوغکوه کواس توهن، هق يي فاكي انتوق کرج دالم ديي کيت هق فرچاي کا يي. تنتو کواس تو تاء اره نق بنديغ. جاي هق تولا دغن کواس هق يي فاكي تکه المسيح ماتي،

- 21 بري بوليه بغکيت هيدوف کليق سمولا تو ، فس ، بري بوليه اڱکيت ناءِ يک دودوق سبله کانن توهن ، دتمفت کواس فنوه تو . دسپتوله المسيح دوق مړينته اتس کواس مان ۲ ، هق ماءنسي اتوا هق فواق ملايکه اتوا فون شيطان ، کواس ۲ هق مات بوليه نمفق اتوا هق تاءليه نمفق فون ، فس توهن بري کا المسيح ني فريغکت تيغکي سکالي فد هق لائين ۲ سموا ، دنيا اتوا داخيرة فون .
- 22 فس توهن هنتر کا دي ، سوروه تعلق سموا سگل تو ، بري جايي فلافيق کاکي دي . دپاله هق توهن بري جايي ربي يځ مليا اتس سموا سگل تو ، انتوق کلوارک توهن .
- 23 ګران کلوارک توهن تو بوليه بنديځ کات ، جايي سرورف توبوه ، هق ربي سنديري جايي کفلا . کلوارک توهن تو جايي تمفت دودوق توهن هق سمفرن ده ، فس دپاله هق نق بري سمفرن سموا تو .

### ماري دتمفت ماتي کي کاتمفت هيدوف

باب 2

- 1 تکه دولو فواق مو دوق تاء کابر چارا حال توهن ، سرورف دغن اورغ هق ماتي ده ، سبب هاتي مو دوق جاهت سوک نق بوات دوسا .
- 2 فد ماس تو ، فواق مو دوق توروت طبيعة جاهت توجو کا دنيا ني ساج . مو دوق باوه فرينته هييليس ، کفلا کواس ۲ جاهت هق مات تاء نمفق . کواس تو هق ماس لاني دوق تاريخ هاتي سموا اورغ هق تاء طلاء کا توهن .
- 3 سسوغکوھن ، دولو کيت سموا ، فواق اکو فون ، دوق سرورف فواق تو جوګ ، دغن توروت هوا نفسو کيت سنديري . اف ۲ هق فيکيران کيت دغن توبوه کيت نق ، کيت توروت کوء تو . فس سابيت تو ، کيت فون دوق باوه مرک توهن سرورف ماءنسي سموا .

- 4 تافي توهن. ڪاي دغن ڪسياغ بلس، فس، دغن سابيت دي
- 5 هابيس ۲ ڪاسيه ڪاڪيت تو، ولوڪيت دوق سروف اورغ ماتي  
دافن توهن، ڪران دوق بوات دوسا لاڳي فون، تافي توهن  
بري ڪيت هيڊوف سمولا، سڪالي دغن المسيح. تننو دغن رحمة  
توهن ني ساج له، ڪيت بوليه سلامت ده!
- 6 فس، دغن سابيت ڪيت دوق سهاتي سپاوا دغن عيسى المسيح،  
توهن اڳڪيت ڪيت ناءِ ڪا فريڱڪ تيڱي، بري دودوق سڪالي  
دغن دي رتمفت ڪواس فنوه تو.
- 7 توجوان توهن بوات لاڳو ني، نق بري نمفق ڪا سموا مائسي،  
لفس سلافيس ۲، ڪات، بسر سوڱو رهمة هق توهن تورون ڪا  
ڪيت، دغن تنجوق ڪاسيه ڪا ڪيت هق دوق سهاتي سپاوا دغن  
عيسى المسيح تو.
- 8 ڪران دغن رحمة توهن ساج له، فواق مو بوليه سلامت ده ڪو  
جالن فرچاي ڪا المسيح، بوڪن هق مو بوات اف ۲، نق. جادي  
هق توهن تورون بلاڪ.
- 9 تاءِ سبب سيڪيت هابوق هق بوليه بري ڪيت اڳڪيت ڊيري،  
ڪران هق توهن تورون تو، بوڪن حاصل هق بوليه دالم عطن  
ڪيت. ڪران توهنله هق بري ڪيت هيڊوف چارا بارو ڪو عيسى
- 10 المسيح، انتوق بري ڪيت بوليه بوات ڪرچ جالن باءِ ڪ، هق  
توهن چارغ ڊولو، نق سوروه ڪيت بوات توروت.

### جادي ساتو دغن ڪران عيسى المسيح

- 11 فواق مو برانق جادي انق ۲ بڻسا لافين فد اورغ ۲ بڻسا  
يهوي. فواق يهوي تو اڳڪيت ڊيري ڪات: ڪيت برسونت ده،  
دوق سوچي انتوق توهن! دي ڪات بلس تو، سابيت روڪون  
هق دي بوات رتوبوه دي. فس دي هيٺا ڪا فواق مو، ڪر  
ڪات: فواق هق تاءِ برسونت! موليقله مو ايغت، بلس مان

مو دودوق ماس دولو، تکه مو تاء کدل دغن توهن تو.

12 فد ماس تو، مو دوق جاءوه فد المسيح، تاء کدل ري لاکي. مو جادي اورغ بغسا لائين، هق تاء ار فلوغ بوليه سگيان دالم فواق يهوي، هق توهن فيليه کات جادي ميليق ري.

فرهوبوغن توهن دغن مائسي تکه تو، برگنتوغ فد فرجنجين توهن کا فواق يهوي تو، بوکن کا فواق مو. تکه تو جوگ، فواق مو دوق دنيا سروف تاء ار هرافن کوء دافن، فس ايغت کات توهن تاء ار.

13 تافي لاني، سابيت مو دوق سهاتي سپاوا دغن المسيح، فواق مو هق دوق سفگغ جاءوه دولو، لاني ماري دوق رافت ده کران عيسي قربان پاوا ري تو.

14 جادي المسيح سنديريله هق باوا اورغ بغسا يهوي دغن اورغ بغسا لائين ۲، ماري دوق بايک مو اکو، جادي ساتو فواق. دينديغ هق دوق سکت، تاءليه کي ماري روا فواق تو، المسيح ماري بري تراليق ده. اف ۲ هق بري جادي سترو روا فواق تو، المسيح بري رونتوه، دغن امبيق هندس کا تبوه ري سنديري.

15 ري بري ليسوس اتوران دالم تورات، سکالي دغن حکوم ۲ هق اورغ يهوي تمبه سنديري بري برت تو. توجوان المسيح، هق جادي روا بغسا دولو تو، نق بري جادي ساتو بغسا هق بارو کران کدوا تو دوق سهاتي سپاوا دغن ري. بالس توله المسيح بوک جالن نق بري روا فواق دولو تو، بايک مو اکو.

16 فس دغن سره پاوا ري دکايو امفت چابغ تو، المسيح بري روا بغسا تو جادي ساتو هاتي ساتو تبوه، بوليه بايک دغن توهن. بالس تو، ري بري هابيس هق دولو دوق سترو تو. سابيت توله، المسيح ماري رويت خبر هق بري بوليه جادي بايک تو، کفد فواق مو هق دولو دوق سفگغ جاءوه دغن

- توهن، سکالي دغن فواق اکو اورغ ييهوي، هق دوق رافت دغن  
 18 توهن. کران کوء جالن المسيح نیله، کیت سماو، اورغ بغسا  
 لائن اتوا اورغ ييهوي قون، ار جالن بولیه مهادف توهن  
 باف، کوء روح ري یغ سا تو.  
 19 سابیت تو، فواق مو هق بغسا لائن، بوکن سروف انق لوار  
 نگرې، هق تاءار سیکیت هابوق سکیان، سروف دولو، دق!  
 لاني مو جاني رعیت ۲ نگرې توهن، سروف سماو هق جاني  
 میلیق توهن. مو ماسوق ده جاني قوم کلوارگ توهن.  
 20 فس کالو بنديغ دغن رومه، فواق مو جاني سروف بات ۲ هق  
 ماري سوسون اتس فلافيق هق ار دولو تو، يائیت اورغ ۲ هق  
 باواء تيته المسيح، سکالي دغن اورغ ۲ هق توهن بري ميمفي  
 فرمان توهن. فس عيسی المسيح سنديري دوق سروف دغن  
 باتو هق مستحق سکالي.  
 21 کران دپاله هق فلکت سماو بات ۲ دالم رومه، انتوق نق بوات  
 تمفت هق سوغ انتوق سمبه کا توهن، تمفت هق سوچي  
 انتوق ربي.  
 22 فس کران مو دوق سهاتي سپاوا دغن المسيح، فواق مو فون  
 ري بري فلکت دغن اورغ ۲ لائن جوگ، نق جاني تمفت توهن  
 دودوق کوء روح ري.

### کرج فولوس انتوق اورغ ۲ بغسا لائن

باب 3

- 1 سابیت نق بري فواق مو جاني میلیق المسيح بالس تو،  
 اکو فولوس کنا ايکت. فس سابیت تو جوگ، اکو برعا انتوق  
 2 فواق مو. تنتو مو بیاس دغر ده، بوکن، کات توهن تورون ده  
 رحمة ري کا اکو، بري اکو جاني اورغ کرج تغکوغ جواب  
 انتوق فواق مو جوگ.  
 3 توهن بوک ده رهسيا ري هق مائسي تاء تاهو دولوتو، بري

- 4 اكو بوليه نمفق دغن ارتي، سروف هق اكو تولىس ده داتس دغن ريغكس. بىلا مو باج اف ۲ هق اكو تولىس، مونق بوليه فهم بالس مان اكو نمفق دغن ارتي، رهسيا چارا حال المسيح، هق توهن تاء بوك كا توء نينيق كو هق دولو ۲ تو.
- 5 تافي لاني دي بري نمفق ده، كوء روح دي، كغد اورغ ۲ هق باوا تيته المسيح، سكالې دغن فواق هق توهن بري ميمفي فرمان توهن.
- 6 فس رهسيا تو، ياءيت كوء جالن خبر يځ باءيك، اورغ ۲ بغسا لائن بوليه سكيان دالم نعمة ۲ توهن، سروف اورغ يهوي. دي ار جوگ سكيان جاني اغكوت ۲ دالم ساتو توبوه. فس لاكي دي بوليه سكيان دالم فركارا ۲ هق توهن جنجي، هق تتف ده كوء جالن عيسى المسيح.
- 7 توهن تورون ساتو نعمة كا اكو، بري اكو فاكې كواس دي بوليه هنتر خبر يځ باءيك تو.
- 8 ولو اكو رنده سكالې دالم سموا اورغ هق توهن فيليه جاني ميليق دي فون، تافي توهن تورون جوگ كا اكو نعمة دي، بري اكو ميمفي كا اورغ ۲ بغسا لائن خبر كات، كاي سوغكوه كيت هق دوق سهاتي سپاوا دغن المسيح، تاء اره نق بنديځ كاي تو.
- 9 فس دي بري اكو بوك كا ماء نسي بوليه نمفق چرف، رهسيا دي تو، هق دي چادغ دولو نق بوك. لافيس ۲ دولو، رهسيا تو دوق تاروه دالم فيكيان توهن، دي هق بري جادي سموا سكل. سبب اف دوق تاروه بالس تو؟
- 10 سبب دي تاروه كا ماس لاني، نق بري كلوارگ توهن بوك رهسيا تو كا كواس مان ۲ هق دوق دتمت كواس فنوه تو، بري بوليه ارتي بايق مان تافن ۲ بيچقسان هق توهن.
- 11 بالس توله جاني كهندق توهن دري دولو ۲ لاكي، فس لاني،



- سمفي ماس هق جاني ده، دغن عيسي المسيح، ربي كيت.  
 12 دغن کران کيت دوق سهاتي سپاوا دغن المسيح تو، فس دغن  
 سابيت کيت فرچاي کاي، کيت براني ماسوق مهادف توهن  
 دغن يقين کات، تنتوي نق تريما.  
 13 سابيت توله، جاغن فواق مو بيمع سابيت اکو کما سوسه  
 انتوق مو ني. جاني بالس تو سابيت نق بري فواق مو بوليه  
 جاس.

### ستارا هق عيسي کاسيه کاکيت

- جادي سبب سموا نيله اکو ماري نق سجدو نق بر دعا کا  
 14 توهن باف. دپاله جادي چنتوه باف هق موليک سکالي کاسموا  
 15 کلوارگ ددنيا اتوا دشرگ فون.  
 16 اکو مينتاء دعا دغن توهن، دي هق کاي دغن کواس تاءليه نق  
 بنديغ، مينتاء دي تورون اتس فواق مو، کواس هق کاي تو،  
 کوء جالن روح دي، بري مو قواة دالم ديري مو.  
 17 فس اکو مينتاء جوگ نق بري المسيح دوق تتف دالم هاتي مو،  
 کران مو فرچاي کاي. اکو بر دعا نق بري فواق مو دوق لکت  
 دالم کاسيه، سروف فوهون هق توبيت اکر بايق، دوق تتف،  
 اتوا سروف رومه هق دوق کجت اتس فلافيک هق کوکوه.  
 18 بالس توله، فواق مو سکالي دغن سموا اورغ هق جادي ميليک  
 توهن، نق بوليه ارتي، بسر ستارا مان المسيح کاسيه کا  
 کيت، لواس هابيس لواس، فنجع هابيس فنجع، تيغکي هابيس  
 تيغکي، دالم هابيس دالم، کاسيه هق دي تو.  
 19 فس ولو کيت تاءليه راس هابيس، کاسيه المسيح فون، تافي  
 اکو نق بري مو کهور فهم کهور بوليه راس کاسيه تو، انتوق  
 نق بري فواق مو فنوه منيتير سمفي ستارا هق توهن سنديري  
 دوق فنوه دغن کاسيه تو.

- 20 توهن دغن کواس يي دالم هاتي کيت ، مهير بوات کرج يي لبيه بايق فد هق کيت مينتاء ، اتوا هق کيت دوق کيرافون .
- 21 سوغ فاتوتله يي بوليه فوجين رسموا هق جادي کلوارک توهن هق دوق سهاتي سپاوا دغن عيسی المسيح تو . بواتله جق ماس لاني ، هيغک سمفي سلام ۲ . امين .

### کنا جادي ساتو توبوه

باب 4

- 1 سابيت دغن کاسيه توهن تو ، اکو ني هق کنا ايکت کران کرج کا ربي ، نق فسن فواق مو جوگ ۲ ، بري توروت جالن هق سوغ دغن هق توهن تنجوق ، تکه يي فغکيل مو سوروه توروت يي دولو تو ، ياءيت کنا رنده هاتي ، جادي اورغ هق هاتي لمه لموت ، کنا صبر دغن اورغ . فس تنجوقله کات مو کاسيه کا اورغ هق مو کنا صبر تو دالم مو اکو .
- 3 کاچغ فيراله موليق ۲ ، اف ۲ هق بري جادي ساتو هاتي . هق ني بوليه روح توهن ، هق بري کيت دوق سنغ ليندغ مواکو ، يي هق جادي سرورف تالي مغنيکت بري کيت دوق سبکس .
- 4 کران توبوه اد سا ساج ، روح فون سا جوگ . فس ، هق مو دوق هارف ، کران توهن فغکيل مو توروت يي فون ، سا تو جوگ .
- 5 ربي کيت سا ، ايمان هق کيت فرچاي سا جوگ . روکون مندي ، تندا کات کيت فرچاي تو فون ، سا جوگ .
- 6 توهن اد سا ساج ، فس يي جاي باف کيت سموا . دياله هق دوق مرينته اتس کيت سموا تو ، دوق کرج دالم کيت سموا تو ، فس يي دوق اد دالم کيت سموا جوگ .
- 7 ولبو بالس تو فون ، تافي کيت سموا ني تريما ده نعمة ۲ ماسيغ
- 8 هق مان المسيح هديه ، ايکوت يي بري . سرورف اد ايات دالم کتاب کات :

تکه ري ناءِيك کليق کا تمفت تيڱي تو،  
 ري باواۍ کواس ۲ هق هاله کا ري، سوروه تورو  
 بلاڱ ري. فس ري هديه تورو نعمة ۲  
 کا اورڱ ۲ هق جادي ميلي ري.

- 9 اف مقصود: ري ناءِيك کليق ساءِ ني تو؟ مقصودن، مولا ۲ ري تورو کا دنيا دولو.
- 10 ري هق تورو تو، هق تولا دغن ري هق ناءِيك کليق سور کا لاڱيت، انتوق نق بري سما عالم ني کنا مڱاکو کات، تاءِار تمفت مان ۲ هق کواس ري تاءِ سمفرن.
- 11 دياله هق هديه نعمة ۲ کا کيت ماسيڱ ۲. ار هق ري سوروه باواۍ تيته المسيح کي، ار فول هق ري بري ميمفي فرمان توهن. فس ار جوڱ هق ري بري بوليہ باواۍ خبريڱ باۍيك کا اورڱ انتوق سلامت. ار جوڱ هق ري بري جاڱ فواق المسيح، فس هق بوليہ مڱاجر فواق تو کاتيڱ.
- 12 توجوان ري، نق چارڱ بري سما اورڱ هق جادي ميلي توهن بوليہ کرج کا ري، انتوق بري کهور کمس توبوه المسيح ياءِيت کلوارگ توهن.
- 13 بالس نيله کيت سما فاکت ماري جادي سهاتي دالم هق کيت فرچاي، سکالي دغن هق کيت تاهو حال انق توهن تو، سهيڱگ کيت هق جاني توبوه المسيح ني، نق چوکوف ماسق، اورڱ هق سمفرن، سروف المسيح سنديري سمفرن ده.
- 14 کالو بالس تو، کيت تاءِ جاني سروف بودق ۲ کچيک هق دوق هاپوت کوۍ تو کوۍ ني، ايکوت فڱاجران هق ري دغر، هق اورڱ فندي منيفو ماري اجر، نق بري دي سست دغن جالن تيڱو داي تو.
- 15 تافي تاءِ کنا بالس تو. کيت کنا دوق فڱگ کجت کا هق بنر،

دغن هاتي کاسيه کا اورغ. بالس توله کيت نق جاي کهور ۲  
چوکوف ماسق هيڭگ سمفرن ده، سروف المسيح کفلا کيت تو.  
16 ني هق جاي کفلا تو، دياله هق بري سماو اغکوت توبوه دوق  
لکت رافت موليق. فس سندي هق سکاتم ۲ فول، ماري ټيگکوف  
جاي ساتو توبوه. بالس نيله، بيلا اغکوت ماسيغ ۲ بوات کرج  
ني تو دغن موليق، سماو توبوه بوليه کهور ۲ کاکه دغن کران  
کاسيه.

### طبعية هق بارو

- 17 کران اکو باوا تيته ربي، اکو فسن جوگ ۲ نق بري امران  
کا فواق مو، جاغن توروت فول جالن هق بغسا مو هق تاءکل  
توهن، بياس توروت. جالن تو تاء ترفاکي.
- 18 اورغ هق توروت جالن تو، هاتي دي گلف ده. دي تاء ار  
سکيان دالم هيڊوف هق توهن بري، سبب دي جاهيل، کرس  
19 کيغ. فراسان مالو هابيس ده. دي سره ډيري دي، کي بوات  
ايکوت هق مان نفسو دي سوروه، دوق فيسه چاري جالن نق  
بوات سماو فرکارا هق تاء سوغ فاتوت بوات.
- 20 تنتو هق فواق مو بلاجر انتوق نق ککل المسيح، بوکن کو  
21 جالن تو. مو دغر ده تنتغ دي بوکن؟ فس کران مو دوق  
سها تي دغن دي، مو بلاجر ده هق بئر، هق کيت بوليه  
نمفق دعيسی بلاک.
- 22 سابيت توله مو کنا تيگلک طبعية مو هق سديا، هق مو  
بياس توروت دولو. توروت جالن تو، نفسو ۲ مو تيغو مو کات  
موليق، تافي سسوځگوهن بري مو توجو نق فونه.
- 23 هاتي مو دغن فيکبران مو، موليقله بري بارو، سالين هابيس بلاک.
- 24 مو کنا امبيق فاكي طبعية هق بارو، هق توهن بري جاي  
سروف طبعية دي سنديري. طبعية مو هق بارو تو، نق بري

پات کا اورغ دغن توروت هق بتول، فس دغن دوق سوچي  
انتوق توهن .

### کيچيفن هق توهن برکنن

- 25 جاغن بوهوغ لاکيله! موليق کنف ۲ اورغ دالم فواق کيت  
کيچيق بتول مو اکو، کران کيت سموا جاي اغکوت بلاک دالم  
توبوه المسيح .
- 26 کالو مو موريه کا اورغ، هق اد موريه دالم هاتي مو لاگي تو،  
جاغله بري جاي دوسا . مو تاء کنا لق سمفي ايسوق ،  
27 تاکوت هييليس ماري نق امبيق تمفت !
- 28 اورغ هق بياس کريت بارغ اورغ، تنتو کنا برادو هق فيشين  
کريت تو . موليق دي کي چاري نفقه هق حلال انتوق ديري  
سنديري، فس انتوق نق بوليه تولوغ اورغ مسکين جوگ .
- 29 دالم کيچيفن مو فول، جاغله توبيت هق فديه ۲ . تافي فاکيله  
فرکتان هق اد فائده بوليه بوات تولوغ اورغ، تمبه سماغت دي  
بري قواۋه لاگي . بالس تو، مو نق جاي جالن هق توهن بوليه  
تورون رحمة دي کا اورغ هق دوق دغر تو .
- 30 جاغله بري روح سوچي دوق سديه هاتي، کران مو تاء سير  
بوات بالس تو . سبب توهن بري روح دي تو، جاي تندا  
دالم هاتي کات، مو جاي ميليق دي، بوليه جامين کات،  
هاري کوۋ دافن توهن نق بري مو سلامت دغن سمفرن .
- 31 بواغله سموا هق بري هاتي مو فاهيت، دوق يارا سممور تو،  
هق بري مو کلوار جاي موريه، هق بري مو کيچيق درس جاي  
ياله، هق بري مو مغوفت کا اورغ، اتوا فون مان ۲ هق توبيت  
دالم فراسان بنجي .
- 32 نق موليق لاگي، امبيق فاکيله بوي بهاس دالم فواق مو دغن  
کسياغ بلس مو اکو . توهن امفون ده دوسا ۲ مو دغن سابيت

المسيح . سروف تو جوگ ، فواق مو فون ڪا معاف مو اڪو .

### جاڪاله هق مان مو دغر

باب 5

1 فواق مو جاني انق ۲ توهن هق بي ڪاسيه سوڳوه .

2 سابيت توله ، موليق مو تيرو چنتوه بي . تنجوقله ڪاسيه  
 مو اڪو دالم فواق مو ، بري سمفي ستارا ڪاسيه هق المسيح  
 تنجوق ڪا ڪيت . ايغتله ، بي ڪاسيه هيغڳ سمفي بي سره ده  
 پاوا بي انتوق ڪيت . هق تو ، قربان هق توهن تريما ده ڪات  
 موليق . ڪالو بنديغ ، بوليه ڪات سروف ڪمپن هق امام باڪر نق  
 سمبه ڪا توهن ، هق اسف بي سمفي ڪا توهن .

3 توهن فيليه فواق مو جاني ميليق بي ده . سابيت توله ، تاء  
 سوغ فاتوت مو دوق دغر فون ، تڪه اورغ ڪيچيق چارا حال اورغ  
 بوات چافوغ ، هق مان اورغ بوات تاء سدف ڪليه ، اتوا فون  
 هق مان بري نق ۲ ڪا هق جاني ميليق اورغ .

4 تاء سوغ فاتوت جوگ مو سنديري فاکي ڪيچيفن چافوغ ، ڪاروت ،  
 اتوا ڪيچيق ڪيلا مولوت . دق ! هق موليقن ، اوچف تريما ڪاسيه  
 ڪا توهن .

5 مو ڪا ايغت ڪات ، اورغ هق بوات چافوغ ، هق بوات تاء سدف  
 ڪليه ، اتوا دوق ايغين نق ۲ ڪا هق جاني ميليق اورغ ، فواق تو  
 تاء ار سئورغ هابوق بوليه تريما تمفت دوق باوه فرينته توهن  
 دغن المسيح . ڪران هق ايغين نق ۲ تو ، جادي سروف بوات  
 بارغ ڪنتي برهالا ، هق اورغ سمبه ڪنتي توهن .

6 جاغله فواق مو بري اورغ ماري تيفو مو ، دغن فاکي ڪيچيفن  
 همفا . اورغ مان ۲ هق تبیغ بوات فرڪارا ۲ هق اڪو سبوت  
 ساء ني تو ، تنتو توهن نق تيمفا مرڪ اتس بي .

7 سبب توله جاغن فواق مو دوق چمفور ڪاول دغن اورغ لاڳو تو .

### مو ماسوق ده دالم چره

- 8 فواق مو سنديري دولو، بياس دوق دالم گلف سروف اورغ ۲ سائي تو. تافي لاني مو دوق دالم چره ده، سبب مو دوق سمهاتي سپاوا دغن رتي. اف ۲ هق مو بوات، بري نمفقله کات مو ماسوق ده دالم چره.
- 9 کران چهيا هق سولوه توله، بري کيت بوليه توبيت حاصلن بسر، يائي هق مان بايک، هق مان جوجور، دغن هق مان سوغکوه.
- 10 فس چوب کاجن بلاجرله هق مان بري رتي برکن.
- 11 جاغن مو ماسوق چمفور دغن فرکارا ۲ تافترفاکي، هق ماري دالم گلف تو. دق، موليک لاگي مو سولوه بري نمفق کات، ستارا مان گلف فرکارا ۲ تو.
- 12 کران نق سبوت فون مالو، فرکارا ۲ هق اورغ بوات دغن سوليت
- 13 تو. تافي بيلا سماو تو دوق لگه دالم چره ده، باروله بوليه نمفق فراغي هق دي بوات تو دغن سبئر. کران اف ۲ هق دوق دالم چره، چرف ده، تافليه دوق ليندوغ لاگي.
- 14 سابيت توار ايات هق کات:
- باغونله فواق مو هق دوق تيدور!
- بغکيتله مو هق دوق سروف اورغ ماتي!
- فس المسيح نق سولوه چهيا اتس مو بري چره.
- 15 فيقست بايک ۲ له بالس مان مو دوق هيديف. مو کنا هيديف سروف اورغ هق بيچق فندي، جاغن بوات سروف اورغ هق تافندي کامق.
- 16 جاغن بري روگي ساج فلواغ هق توهن بري کفد مو، کران ماس لاني، بايق هق جاهت.
- 17 سابيت توله، جاغن مو بودوه، تافي چاري بري ارتي هق مان

توهن سوروه مو بوات.

### بري ڊيري مو فنوه دغن روح توهن

- 18 جاغن ماكن هيڱگ سمفي مابوق اير جابيت ماسم، نق  
بري ڊيري مو فنوه ساج. لبيه موليق لاڳي، تريما بري ڊيري مو  
فنوه دغن روح توهن سعمور.
- 19 بالس تو، تکه فواق مو ماري برهيمفون رامپي ۲، موليقله فاکت  
برديکير ايات ۲ دالم کتاب پاپي لاڳو ۲ نق فوجي کا رڻي  
دغن سبولت ۲ هاتي.
- 20 اوچف تريما کاسيهله سعمور کا توهن باف، سموا فرکارا اف ۲  
هق جاني تو، اتس نام رڻي کيت، عيسيٰ المسيح.

### عاده اورغ لاڳي بيني

- 21 فواق مو سموا دوق حرمة کا المسيح. سابيت تو، تندوقله  
مو اکو دالم فواق مو.
- 22 اورغ هق جاني بيني، تندوق حرمتله کا توء لاڳي مو سروف  
مو تندوق حرمة کا رڻي.
- 23 کران اورغ هق جاني توء لاڳي جاني کفلا اتس بيني بي سروف  
المسيح جاني کفلا اتس کلوارگ توهن. کلوارگ توهن تو  
سروف توبوه، هق المسيح سنڊيري جاني کفلا. فس دپاله  
بري سلامت کا کلوارگ توهن تو.
- 24 بالس مان کلوارگ توهن دوق تندوق حرمة کا رڻي، بالس تو  
جوگ اورغ هق جاني بيني کنا تندوق حرمة کا توء لاڳي بي،  
اتس سموا فرکارا.
- 25 فس اورغ هق جاني لاڳي فول، کاسيهله کا بيني مو، ستارا  
مان المسيح تنجوق کاسيه دغن جوغ سره پاوا انتوق کلوارگ  
توهن تو.



- 26 سابیت المسیح بوات بالس تو، دي نق بري کلوارک توهن سوچي انتوق توهن، دغن بري کلوارک توهن تو تریم فرکتان توهن سکالي دغن تریم روکون مندي.
- 27 توجوان المسیح، نق بري کلوارک توهن چوکوف سمفرن ده بولیه مهادف دي دغن تاءار چاچت تاءار چدرا، سوچي ده انتوق دي.
- 28 اورغ هق جاي لاکي فول، کنا کاسیه کابیني دي، سروف دي کاسیه کاتوبوه دي سندیري. سسوغکوئن، اورغ هق کاسیه کابیني دي، تاءالاین فد کاسیه کادیري دي ده.
- 29 تاءار سئورغ هابوق هق بنچی کاتوبوه دي، سسوغکوئن، دي فیرا بلا توبوه دي تو. سروف تو جوگ المسیح فیرا بلا کیت هق جاي کلوارک توهن.
- 30 کران کیت جاي سروف اغکوت ۲ دالم توبوه المسیح ده.
- 31 سروف ار ایات دالم کتاب کات:

سابیت نیله، اورغ جنتن کنا تیغل ایو یاف دي،  
کي دوق سکمفوه دغن بیني دي.  
فس دوا اورغ تو نق جاي سروف ساتو اورغ.

- 32 ایات سائی بري پات حال لاکي بیني، تافي اکو فولوس ارتي کات مقصود دي بسر لاکي، ماسوق دغن المسیح جاي ساتو دغن کلوارک توهن تو.
- 33 تافي کنا مئنا جوگ دغن فواق مو. لاکي کنا کاسیه کابیني، سروف کاسیه کادیري دي سندیري. فس بیني فول، کنا حرمة کاتو لاکي دي.

انق ۲ دغن ایو یاف

باب 6

فواق مو هق جاي انق فون، کنا تورووت سموا فرینته

اييو باف مو، کران مو دوق سهاتي سپاوا دغن ربي. فرکارا ني واجب کا بوات.

دالم سفولوہ حکوم تو، هق کات:

2

حرمتله کا اييو باف مو،

هق ني حکوم هق فرتام هق توهن تمبه جادي فرجنجين.

فرجنجين سا ني توکات:

3

مو بوات بالس تو، مو نق ماجو، فس

توهن نق بري لنجوت عمور مو دالم دنيا.

تافي فواق مو هق جاي اييو باف فول، جاغن مو دوق مشيفيق

کا انق ۲ مو سهيفگ دي ناءيك موريه. موليق لاگي فيرا ديديق

دي کو جالن هق سوغ دغن جالن ربي.

4

همب ۲ دغن توان دي

فواق مو هق جاي همب اورغ فون، کنا بوات توروت هق

توان مو سوروه، دغن تاکوت کتر کناليج، دغن هاتي سجالن

ساج، فس بوات سموا تو سروف دوق بوات کا المسيح.

فس جاغن مو بوات موليق تکه توان دوق اد ساج، نق بري دي

برکنن کغد مو، تافي بلاکغ توان مو بوات هودوه، دق! موليق

لاگي مو بوات سروف همب ۲ المسيح، هق توروت کهندق

توهن دغن سبولت ۲ هاتي.

بواتله کرج مو تو دغن سوک هاتي، هق سوغ فاتوت دغن

بوات کرج انتوق ربي، بوکن انتوق مانسي ساج.

کران ايغتله، ربي نق بري بالسن کا اورغ ايکوت هق مان دي

بوات باءيك، بلرله دي جاي همب اورغ اتوا توان فون.

فس فواق مو هق جاي توان اورغ کرج فول، کنا بوات سروف

5

6

7

8

9

همب ۲ المسيح جوگ. تاهنله مولوت مو، جاغن دوق مڃهودوه  
 كا كولي مو تو. کران ایغتله کات، همب مو تو سرورف دغن مو  
 سندیري، سام ۲ ار توان دشرگ. توان ني جاي حاکيم هق  
 عاديل، هق تیغوق سرورف سماو.

### فرکاکس ۲ فرغ هق توهن بري

- 10 فس هق سور هق اكو نق رویت، برديريله بري قواة ۲.  
 ایغت کات مو دوق سهاتي سپاوا دغن رتي عیسی، فس سابیت  
 تو، مو بولیه امیق فاکی. کواس بسر هق دي.
- 11 بوبوه فاکيله فرکاکس ۲ فرغ هق توهن بري ار چوکوف کنف  
 انتوق بولیه برلاون، تکه هیلیس ماري نق تیغو مو.
- 12 سبب بوکن دغن ماء نسي هق کیت دوق لاون، تافي دغن کواس ۲  
 جاهت مان ۲ هق دوق مرینته دالم فریاغ کلف ني، دنیا  
 اتوا دتمفت ار کواس فنوه تو فون.
- 13 سابیت توله، لاني فاکيله فرکاکس ۲ فرغ هق توهن بري  
 چوکوف کنف تو، فس بیلا هاري هق جاهت سمفي ماري ده، مو  
 نق بولیه برلاون سمفي سور، فس نق بولیه دوق برديری لاگی،  
 اغکیت بندیرا.
- 14 سابیت تو، برديری لاونله ! امیق فعاجران سبهر هق توهن  
 بري، بوات تالي فیغکن مو، فس فاکيله فراغي جوجور، بوات  
 سرورف باجو بسی هق تیکم تاء ماسوق.
- 15 فس امیقله خبر یغ باءیک، هق کات ار جالن ماء نسي کیت  
 بولیه باءیک دغن توهن تو، بوات جاي کاسوت هق تافق  
 کجت، تاء لیچین.
- 16 فس امیق فاکی جوگ، هق مو دوق هارف کا توهن تو، بوات  
 جاي فذفیس هق مو کنا تیبیغ سممور. بالاس تو بولیه بري  
 فادم انق فانه افي هق دوق مپالا، هق هیلیس فانه ماري

- 17 کوء مو.  
تريماله سلامت هق توهن بري، بوات جادي توفى بسي.  
فس امبيق فاكي ايات ۲ هق روح توهن بري كد مو، بوات  
سروف فدغ.
- 18 فس بواتله سموا فرکارا سا<sup>۹</sup>ني دغن برعا، تاء کيرا فرياغ مان  
فون، ايکوت جالن هق روح توهن فيمفين. دغن سابيت تو  
مو کنا جاگ ڊيري بري کابر، نق بوليه تبیغ مینتاء دعا انتوق  
سموا اورغ هق جاني ميليک توهن. فس انتوق اکو گاتيک،  
مینتاء بري اکو فلواغ کيچيک دغن براني، انتوق بوک بري  
اورغ ارتي رهسيا خبر یغ بائیک تو.
- 20 ولو اکو دوق دالم جيل لاني فون، المسيح بري اکو باوا<sup>۹</sup>  
تيته دي ميمفي خبر یغ بائیک تو. تولوغ مینتاء دعاله انتوق  
اکو، بري براني رويت خبر تو، هق سوغ کنا بوات.

### فولوس کيريم سلام

- 21 تيکيکوس، اديک هق اکو کاسيه سوغکوه، هق کرج کا ربّي  
دغن اخلاص هاتي، نق رويت کا فواق مو خبر اکو بالس  
مان لاني.
- 22 جادي سبب توله اکو سوروه دي کي کا تمفت مو، بري فواق مو  
بوليه تاهو خبر فواق اکو دسيني، فس انتوق نق بري سماغت  
کا فواق مو گاتيک.
- 23 اکو مینتاء توهن باف دغن ربّي عسي المسيح، تورون سلامت  
سجهترا اتس سموا اديک براديک باليک مو، بري مو فکغ ايمان  
کهور قواة، دغن کاسيه.
- 24 فس مینتاله بري توهن تورون رحمة دي اتس اورغ مان ۲ هق  
دوق کاسيه کا ربّي کيت عيسى المسيح دغن کاسيه تاء فوتوس.